

दिनांक 26.09.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- उपराष्ट्रपति जगदीप धनखड़ कह्यो-धर्म सगळां ने जोड़बा अर आगे बधावण रो काम करे है।
- चिकित्सा अर स्वास्थ्य मंत्री गजेन्द्र सिंह खींवसर सगळां ऊं प्रदेश ने तंबाकू मुक्त बणावण री जिम्मेदारी निभावण बाबत् कह्यो।
- प्रधानमंत्री जनजातीय उन्नत ग्राम अभियान रा तैत सवाईमाधोपुर जिलो ई चुणी ज्यो।
- प्रदेश रा लंकाऊ-ऊगणी हलकां मांय केई ठोडां मेह बरस्यो-दौसा जिला मांय बिरखा ऊं खेता मांय पाणी भर्यो।

000

उपराष्ट्रपति जगदीप धनखड़ आज जयपुर मांय हिन्दू आध्यात्मिक अर सेवा मेळा रो उद्घाटन कीनो। ई मौके वे कह्यो के देश मांय न्यारी-न्यारी धार्मिक संस्थावां अर सामाजिक संगठन सेवा रा कामां रे जरिये इंसानियत री सेवा कर रह्या है। वे कह्यो के धर्म सगळां ने जोड़े है।

000

पंचायतीराज राज्य मंत्री एस.पी सिंह बघेल पंचायत अनुसूचित क्षेत्र विस्तार कानून (पीईएसए) ने जमीनी स्तर माथे लागू करण बाबत् ज़ोर दीनो है। वे आज नई दिल्ली मांय पी ई एस ए रा बारा मांय राख्यी ज्या राष्ट्रीय सम्मेलन मांय बोल रह्या हा। बघेल ग्राम पंचायत विकास योजनावां अर इण ऊं जुड़ी सिखावण ने असरदार बणावण सारु पी ई एस ए -जीपीडीपी पोर्टल अर सिखावण रा सात खास मॉड्यूल सरु कीना।

000

प्रधानमंत्री नरेन्द्र मोदी री अगुवाई वाली केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारु आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी ज्यी है। इण मांय आज पेश है पशुपालन अर डेयरी हलका मांय व्ह्या विकास रा कामां रा बारा मांय जाणकारी-पशुपालन अर डेयरी विभाग भारत पशुधन नामक डेटा बेस विकसित कीनो है। इण ऊं किसानां ने सरकारी योजनावां अर सेवावां रो फायदो उठावण मांय सहूलियत व्ही है। ई रे ज़रिए ढांढा-ढोरां मांय बीमारियां री रोकथाम अर ईलाज ऊं जुड्या कामां री निगराणी करी जा रही है। मौजूदा दौर मांय हाल तांई अहलकारां अर मजूरां री ओर ऊं 50 करोड़ ऊं बत्ती जाणकारियां डेटा बेस मांय डाली ज्यी है। सहकारी डेयरी हलका मांय दूध प्रसंस्करण रा बूता मांय ई खूब बधोरी व्ही है। पहली दफ़ा देशभर मांय

मोबाइल पशु चिकित्सा इकाइयां खोली जा रही है अर 27 राज्यां मांय 3 हज़ार 165 मोबाइल इकाइयां काम कर रही है। पशुपालन ऊं जुड़्या कामां मांय लाग्योडा करीब 10 करोड़ किसानां ने वां रा घर मांय ई पशुधन स्वास्थ्य सेवावां मुहैया करायी जावेला।

000

सूचना अर प्रसारण राज्य मंत्री डॉ. एल. मुरुगन सिरौही जिला मांय आबूरोड़ माउंट आबू रा दौरा माथे पधार रह्या है। वे आज रात करीब 9 बज्यां आबूरोड़ रा ब्रह्मकुमारी संस्थान पधारेल। वां रो काल ब्रह्मकुमारी संस्थान मांय राख्या जावण वाळा राष्ट्रीय मीडिया सम्मेलन रो उदघाटन करण रो कार्यक्रम है। वे ब्रह्मकुमारी संस्था मांय सूरज री रोशनी ऊं बिजली बणावण री मशीनां ई देखेला अर योग कार्यक्रम मांय ई शिरकत करेला।

0000

नागौर जिला मांय जायल ब्लॉक रा बोड़वा अर खाटू कलां गांव प्रधानमंत्री जनजातीय उन्नत ग्राम अभियान रा तैत काम करावण सारू चुणी ज्या है। आं गांवां मांय ई अभियान रा तैत असरदार तरीका ऊं काम करावण सारू जिला परिषद रा मुख्य कार्यकारी अधिकारी ने नोडल अहलकार बणायी ज्या है। सवाईमाधोपुर मांय ई आज प्रधानमंत्री जनजातीय उन्नत ग्राम अभियान ऊं जुड़्या अहलकारां री मीटिंग राख्यी ज्यी। मीटिंग मांय जिला परिषद रा मुख्य कार्यकारी अधिकारी हरिराम मीणा बतायो के प्रधानमंत्री जनजातीय उन्नत ग्राम अभियान रो मकसद संशोधित क्षेत्र विकास प्राधिकरण-माडा हलका मांय जनजातीय तबका रा लोगां ने सरकारी योजनावां रो फ़ायदो दिरावणो है। वे बतायो के ई रा तैत प्रधानमंत्री आवास योजना रा तैत बणायी ज्या मकान, जल जीवन मिशन रे ज़रिये हर घर ताई नळ ऊं पाणी पूगावण, आंगनबाड़ी केन्द्र रो विकास, आयुष्मान भारत योजना रे मार्फत स्वास्थ्य बीमा, छात्रावास, स्कूल अर अस्पताल बणा र गांवां बुनियादी ढांचा रा विकास ऊं जुड़्या काम ई कराया जावे है। मीणा बतायो के आकांक्षी जिला सवाईमाधोपुर मांय जनजातीय तबका री जनता री बहुतायत वाळा हलकां मांय 18 महकमा जुड़्या 25 भांत रा काम कराया जावेला। उन्नत ग्राम अभियान रो जिला स्तर रो कार्यक्रम 2 अक्टूबर ने रामसिंहपुरा रा राजीव गांधी क्षेत्रीय प्राकृतिक विज्ञान संग्राहलय मांय राख्या जावेला।

000

चिकित्सा अर स्वास्थ्य मंत्री गजेन्द्र सिंह खींवसर आज जयपुर मांय टोबैको फी यूथ कैंपेन 2.0 रा पोस्टर रो विमोचन कर र अभियान री सरूआत कीनी। ई मौके चिकित्सा मंत्री 60 दिन रा तंबाकू मुक्त अभियान रो ऐलाण करता थकां नौजवानां अर बच्चां मांय तंबाकू ऊं बण्या सामान काम लेवण माथे चिंता जतायी। चिकित्सा मंत्री सगळा ऊं राजस्थान ने तंबाकू मुक्त बणावण री जिम्मेदारी निभावण री अपील कीनी।

000

कार्यक्रम मांय राष्ट्रीय स्वास्थ्य मिशन री निदेशक डॉ. भारती दीक्षित तंबाकू मुक्त अभियान री कामयाबी सारू नीतियां ने करड़ाई ऊं लागू करण माथे जोर दीनो।

000

केंद्रीय संस्कृति अर पर्यटन मंत्री गजेन्द्र सिंह शेखावत संजीवनी कॉ-ऑपरेटिव सोसायटी मामला मांय राजस्थान हाईकोर्ट ऊं क्लीन चिट मिल्यां पाछे आज पैली वाळा मुख्यमंत्री अशोक गहलोत माथे सियासी स्वार्थ सारू सरकार अर शासन व्यवस्था रो बेजा इस्तेमाल करण रो आरोप मांड्यो। आज जोधपुर मांय खबरनवीसां सागे बातचीत करता थकां शेखावत कह्यो के ई मामला मांय न्याय व्हयो है अर अन्याय रो ओजू पर्दाफाश व्हयो है।

000

प्रदेश मांय स्वच्छता ही सेवा अभियान रा तैत आज ई न्यारा-न्यारा कार्यक्रम राख्यी ज्या। पाली मांय स्वच्छता संवाद अर स्वच्छता चौपाल रे ज़रिए साफ़-सफ़ाई राखण रा

बारा मांय जाग जगायी ज्यी। नीमकाथाना रा डॉ. भीमराव अंबेडकर छात्रावास मांय श्रमदान करी ज्यो। ई मौके विद्यार्थियां ने सफ़ाई ने स्वभाव अर संस्कार मांय शामिल करण अर रोजीना श्रमदान करण री शपथ दिरायी ज्यी। बाड़मेर मांय मुख्य कार्यकारी अधिकारी सिद्धार्थ पलनीचामी आज साइकिल माथे सवार व्हे र सफ़ाई व्यवस्था रो जायजो लीनो अर जरूरी हुकम दीना। हनुमानगढ़ मांय स्कूली बच्चा, खुद सेवक संगठनां रा सदस्य, जनता रा नुमाइंदा अर ज़िला प्रशासन रा कर्मचारी 'स्वभाव स्वच्छता-संस्कार स्वच्छता' थीम माथे स्वच्छता रैली निकाली। विद्यार्थी बाजा बजा र साफ़-सफ़ाई राखण बाबत् जाग जगायी।

जिला कलेक्टर काना राम सेंद्रल पार्क मांय मौजूद लोगां ने सफ़ाई राखण री शपथ दिरायी। सिरोही मांय केंद्रीय संचार ब्यूरो रा क्षेत्रीय कार्यालय री ओर ऊं पिंडवाड़ा पंचायत समिति रा जनापुर गॉव मांय संपूर्ण पोषण अर स्वच्छता ही सेवा रा बारा मांय जाग जगावण बाबत् कार्यक्रम राख्यी ज्यो। जयपुर रा आमेर महल मांय साफ़-सफ़ाई ने बधावो देवण सारु महल परिसर मांय गुटखा, बीड़ी अर तंबाकू काम आवण वाली हर भांत री सामग्री ले जावण परां रोक लगा दीरीजी है। आमेर महल मांय दाखिल व्हेवण री ठौड़ ही ऐड़ी सामग्री जमा करावणी व्हेला।

000

प्रदेश रा ऊगणी अर लंकाऊ हलकां मांय आज केई ठौड़ां मेह बरस्यो। झालावाड़ जिला मांय आज दोपहरां पाछे बादळां री गाज सागे बिरखा व्ही। झालरापाटन मांय ई बिरखा व्ही। सवाईमाधोपुर मांय कोई आधा घंटा ताई चोखो मेह बरस्यो। दौसा मांय ई आज केई ठौड़ां बिरखा व्ही। महुआ, सिकराय अर लालसोट रा खेतां मांय बिरखा रो पाणी भर जावण ऊं साखां ने नुकसाण व्हेवण री शंका है। बारां, पाली अर टोंक मांय छांटा-छिड़का रा समाचार है। पाली ज़िला रा रानी मांय जोरदार बिरखा व्ही। बांसवाड़ा मांय ई सिंज्या री पोर मेह बरस्यो। दूजी कानी बाड़मेर ज़िला मांय तेज गर्मी रे कारण साखां मुरझावण लागी है। ई बीचे प्रदेश रा कुछ और हलकां मांय चौमासा री ई रुत री बिरखा बंद व्हे गयी है। मॉनसून री वापसी रेखा अब चूरु, अजमेर अर माउंट आबू व्हेती निकळ रही है। मौसम केन्द्र जयपुर रे मुजब 30 सितंबर ताई कोटा अर उदयपुर संभाग रा कुछ हलकां मांय बिरखा रा आसार है जद के भरतपुर, जयपुर अर अजमेर संभाग रा कुछ हलकां मांय काल ऊं तीन दिन ताई बिरखा रा आसार है।

000

14 साल उम्र ताई रा खिलाडियां री राज्य स्तर री 68वीं टेबल टेनिस होड़ रो आज जालौर रा शाह पूंजाजी गेनाजी स्टेडियम मांय सांसद लुंबाराम चौधरी उदघाटन कीनो। होड़ मांय 35 ज़िलां रा खिलाड़ी सिरकत कर रहया है। ई मौके सांसद कह्यो के खेल ने खेल भावना ऊं खेलणो चाहिजे। राज्य स्तर री 68वीं बास्केटबॉल होड़ ई आज बाड़मेर रा आदर्श स्टेडियम मांय सरु व्ही।

होड़ मांय न्यारा-न्यारा ज़िलां री 100 ऊं बत्ती टीमां सिरकत कर रही है। 14 साल उम्र ताई रा खिलाडियां री राज्य स्तर री 68वीं क्रिकेट होड़ ई आज झालावाड़ रा विजयाराजे सिंधिया राजकीय खेल संकुल मांय सरु व्ही। होड़ मांय प्रदेश रा सगळा ज़िलां ऊं करीब 1 हजार 200 खिलाड़ी सिरकत कर रहया है।

000